



Paul Davies AS
Cadeirydd,
Pwyllgor yr Economi, Masnach a Materion Gwledig
Senedd Cymru
SeneddEconomy@senedd.wales

13 Medi 2023

Annwyl Paul,

Rheoliadau Cynhyrchion Diogelu Planhigion (Diwygiadau Amrywiol) 2023

Hoffwn hysbysu'r Pwyllgor o'm bwriad i roi fy nghydsyniad i Lywodraeth y DU wneud a gosod Rheoliadau Cynhyrchion Diogelu Planhigion (Diwygiadau Amrywiol) 2023.

Derbyniais lythyr gan Weinidog Ansawdd a Chadernid Amgylcheddol y DU, Rebecca Pow ar 10 Awst 2023 yn gofyn am fy nghydsyniad ffurfiol i Reoliadau Cynhyrchion Diogelu Planhigion (Diwygiadau Amrywiol) 2023. Mae'r Rheoliadau'n gorgyffwrdd â pholisi datganoledig ac yn effeithio ar Gymru. Bydd y Rheoliad yn cwmpasu Cymru, Lloegr a'r Alban ac mae cais tebyg wedi'i anfon at Weinidogion yr Alban am eu cydsyniad.

Mae'r Rheoliadau'n defnyddio pwerau a roddir gan adrannau 14 (2) ac 20 (1) o Ddeddf Cyfraith yr UE a Ddargedwir (REUL) 2023. Mae adran 14(2) yn darparu y caiff awdurdod cenedlaethol perthnasol drwy reoliadau ddirymu unrhyw gyfraith UE eilaidd a ddargedwir a'i disodli â darpariaeth y mae'r awdurdod cenedlaethol perthnasol yn ystyried ei bod yn briodol i gyflawni'r un amcanion neu amcanion tebyg. Mae adran 20(1) yn darparu pwerau i wneud rheoliadau o dan y Ddeddf gan gynnwys pwerau i wneud (a) darpariaethau gwahanol at ddibenion neu feysydd gwahanol; (b) darpariaeth atodol, ategol, canlyniadol, trosiannol, dros dro neu arbedol. At ddibenion Adran 21(1), ystyr awdurdod cenedlaethol perthnasol yw Gweinidog y Goron, awdurdod datganoledig, neu un o Weinidogion y Goron sy'n gweithredu ar y cyd gydag un neu ragor o awdurdodau datganoledig.

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaeth.Lesley.Griffiths@llyw.cymru
Correspondence.Lesley.Griffiths@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

Pwrpas y Rheoliadau yw ymestyn dros dro ddarpariaethau pontio a roddwyd ar waith trwy ddeddfwriaeth ymadael â'r UE mewn perthynas â thrin hadau ac â chynhyrchion amddiffyn planhigion. Y nod yw galluogi cyflenwad digonol o hadau wedi'u trin a chynhyrchion diogelu planhigion ym marchnad Prydain Fawr gan gefnogi sefydlu cynydau da a chostau is i dyfwyr a phrynwyr bwyd a bwyd anifeiliaid.

Bydd y Rheoliadau'n dilyn y weithdrefn gadarnhaol (fel sy'n ofynnol gan baragraff 5 o Atodlen 5 i'r Ddeddf REUL). Y bwriad yw gosod y Rheoliadau gerbron Senedd y DU ar 16 Hydref 2023 gyda dyddiad cychwyn o 31 Rhagfyr 2023.

Er mai egwyddor gyffredinol Llywodraeth Cymru yw y dylai cyfraith sy'n ymwneud â materion datganoledig gael ei gwneud a'i diwygio yng Nghymru, y tro hwn ystyrir ei bod yn briodol i Lywodraeth y DU ddeddfu ar lefel Prydain Fawr. Mae Iechyd Planhigion a Phlalladdwyr yn feysydd y mae Gweinidogion Cymru yn aml wedi rhoi eu cydsyniad i'r ddeddfwriaeth gael ei gwneud ar lefel Prydain Fawr oherwydd y modd yr ymdrinnir â'r pwnc ar lefel y DU. Trwy wneud hyn, sicrhair nad oes gwahaniaeth rhwng rheoliadau Cymreig a rheoliadau rhannau eraill y DU, gan leihau unrhyw ddryswch ac anfantais i fasnachwr Cymru a lleihau unrhyw faich gweinyddol posibl i'r Awdurdod Gweithredol Iechyd a Diogelwch (HSE) wrth weinyddu trwyddedau ar gyfer masnach gyfochrog ac wrth ymgymryd ag unrhyw weithgarwch gorfodi. Mae'r HSE yn ymgymryd â nifer o swyddogaethau ar ran Gweinidogion Cymru ac awdurdodau eraill Prydain Fawr drwy Gytundebau Asiantaeth.

Rwyf wedi ysgrifennu llythyr tebyg at Huw Irranca-Davies AS, Cadeirydd y Pwyllgor Deddfwriaeth, Cyfiawnder a'r Cyfansoddiad.

Yn gywir



Lesley Griffiths AS/MS
Y Gweinidog Materion Gwledig a Gogledd Cymru, a'r Trefnydd
Minister for Rural Affairs and North Wales, and Trefnydd